

Morning Dogri (NSD) National News Bulletin 01-02-2025

आकाशवाणी

- खजाना मंत्री निर्मला सीतारमण होर अज्ज लोकसभा च ब'रे 2025–26 दा केन्द्री बजट पेश करडन।
- राष्ट्रपति द्रौपदी मुर्मू होर अज्ज नमीं दिल्ली दे भारती मंडपम च विश्व पुस्तक मेले 2025 दा उद्घाटन करडन।
- केन्द्र सरकारै चार होर नमीं थाहरें गी रामसर थाहरें च शामिल करने दा ऐलान कीता ऐ जेह्दे'नै हून इ'नें थाहरें दी गिनतरी बधियै 89 होई गई ऐ।
- अमरीका दे राष्ट्रपति डोनाल्ड ट्रम्प हुंदे आसेआ चीन, कनाडा ते मैक्सिको सने अमरीका दे केई प्रमुख बपारिक भागीदारें पर अज्जै थमां बड़े भारी शुल्क लाए जाडन।
- हॉकी इंडिया लीग च, जे.एस.डब्ल्यू. सूरमा हॉकी क्लब गी हराइयै हैदराबाद तूफान्स दी टीम फाईनल च पुज्जी गई ऐ।
- मर्दे दे टी-20 क्रिकेट च भारत नै जंदी रातीं पुणे च खेड्ढे गेदे मजूदा श्रृंखला दे चौथे मैच च इंग्लैंड गी 15एं रन्जें कन्नै हराइयै श्रृंखला च 3–1 दी बढ़त बनाई लैती ऐ।

<><><><><><>

Budget

केन्द्री खजाना मंत्री निर्मला सीतारमण होर अज्ज लोकसभा च 2025–26 ब'रे दा केन्द्री बजट पेश करगंन। मोदी सरकार दे त्रीए कार्यकाल दा एह पैहला पूरा बजट होग। निर्मला सीतारमण होर उपरोतली अपना 8मां बजट पेश करियै नमां इतिहास रचगंन, जेह्दे च उंदे आस्सेआ अजें तोड़ी पेश कीते गेदे दऊं अंतरिम बजट बी शामिल न। बजट पेश करने दे अलावा कल आर्थिक सर्वेक्षण, संसद दे दौनें सदनें च रखेआ गेआ जेह्दे च अर्थबवस्था दी कारकरदगी दा लेखा जोखा पेश कीता गेदा होंदा ऐ। बजट कोला समाज दे हर वर्ग गी मतिया मेदां न जिसलै जे माहिरें दा आखना ऐ की जे सरकार नै 2047 भारत गी इक विकसित राष्ट्र बनाने दा लक्ष्य मित्थे दा ऐ तां बजट दा पूरा जोर इस ब'रे बी पिछले ब'रे आला लेखा ढांचागत विकास कम्में, समाज कल्याण, ग्रामीण विकास ते हाल च गै अर्थबवस्था च आई दी नरमी गी रफ्तार च बदलने दे उपाह पर होई सकदा ऐ।

<><><><><><>

World Book Fair

नमीं दिल्ली विश्व पुस्क मेला 2025 नमीं दिल्ली दे भारत मंडपम च पैहली फरवरी गी शुरू होआ रदा ऐ। इस बरे मेले दा विषय सार ऐ "हम भारत के लोग"। 9एं दिनें तोड़ी चलने आहले इस मेले दा उद्घाटन राष्ट्रपति द्रौपदी मुर्मू होर करंगन। आकाशवाणी समाचार कन्नै गल्ल करदे होई नैशनल बुक ट्रस्ट दे निदेशक युवराज मलिक होरें दससेआ जे इस बरे लेई मुख्य देश रूस ऐ ते एहदे च फ्रांस, अर्जेंटीना, स्पेन, कोलंबिया, संयुक्त अरब अमीरात ते कतर सने 50 कोला मते मुख्य हिस्सा लै करदे न। उनें दस्सेआ जे मेले च कोई 2 ज्हार प्रकाशक ते इक्क ज्हार वक्ता हिस्सा लैंगन।

<><><><><><>

Ramsar Sites

केन्द्र नै भारत च 4 होर नमीं रामसर थाहरें दा ऐलान कीता ऐ जेहदे कन्नै कुल आंकड़ा 89 पुज्जी गेआ ऐ। इक सोशल मीडिया पोस्ट च पर्यावरण, जंगलात ते जलवायु बदलाह मंत्रालय नै आखेआ जे नमीं आली जमीन यानि वैटलैंडस सरबन्धी कुलसंसारी ध्याड़े दे पैहले सरकार नै घोषणा कीती ऐ जे तमिल चन्नेई च सक्कराकोटाई पक्षी अभ्यारण्य ते थेरकांगल पक्षी अभ्यारण्य। सिक्किम च खेचिओपालरी नमीं आली जमीन ते झारखंड च उधवा झील गी भारत दी रामसर सूचि च शामिल कीता गेआ ऐ।

<><><><><><>

VP-Mahakumbh

उपराष्ट्रपति जगदीप धनखड़ होर अज्ज महाकुंभ प्रयागराज जांगन। धनखड़ होर संगम च पवित्र डुबकी लांगन। साढ़े संवाददाता नै दस्सेआ ऐ जे भव्य ते पवित्र महाकुंभ नै पूरी दुनिया दा ध्यान अपनी बक्खी खिच्चेआ ऐ। बक्ख-बक्ख देशें दे राजदूत बी अज्ज महाकुंभ च पुज्जगंन।

<><><><><><>

Sachin

महान साबका क्रिकेटर सचिन तेन्दुलकर होरें गी अज्ज मुंबई च इक भव्य सालाना कार्यक्रम च बीसीसीआई दे लाईफ टाइम अचीवमेंट अवार्ड कन्नै सम्मानित कीता जाग। तेंदुलकर होर एह सम्मान पाने आले 31में क्रिकेटर होंगन। 1994 च भारत दे पैहले क्रिकेट कप्तान कर्नल सी.के. नायडू हुंदे सम्मान च एह पुरस्कार शुरू कीता गेआ हा। 51 बरें दे तेंदुलकर होर जिनें शामिल आस्तै 664 अंतर्राष्ट्रीय मैच खेड्डें न, दे नां सब्बने शा मते टैस्ट ते इक दिवसीय अंतर्राष्ट्रीय मैच खेड्डने दा रिकार्ड ऐ। उनें टैस्ट मैचें च 15 ज्हार 921 ते ओडीआई च 18 ज्हार 426 रंज बनाए। 2011 च विश्व कप जित्तने आली भारती टीम दा सचिन तेंदुलकर हुंदा महत्वपूर्ण हिस्सा ऐ। 2023 च एह लाईफ टाइम अचीवमेंट अवार्ड साबका भारती मुख्य कोच रवि शास्त्री ते महान विकट कीपर फारुक इंजीनियर होरें गी दित्ता गेआ हा।

<><><><><><><>

Srilanka Vehicles Import

श्रीलंका नै कारें दे आयात उप्पर प्रतिबंधें च ढिल्ल देने लेई इक राजपत्र— गजट जारी कीता ऐ। एहदे'नै एह सारत मिलदी ऐ जे श्रीलंका गंभीर आर्थिक संकट दे बाद बल्ले—बल्ले सामान्य स्थिति बक्खी परतोआ करदा ऐ। अधिसूचना च पैहली फरवरी थमां निजी गड्डिडें लेई सीमा—आयात शुल्क पर 50 फीसद सरचार्ज लाने दी गल्ल आखी गई ऐ। श्रीलंकाई सरकार नै बक्ख—बक्ख राजपत्र बी जारी कीते न जिंदे च इलेक्ट्रिक गड्डिडें उप्पर संशोधित टैक्स ते नमें लक्जरी टैक्स दा ब्यौरा दित्ता गेआ ऐ। श्रीलंका नै पैहले 2021 च नोटें दी छपाई ते अन्तर्राष्ट्री मुद्रा कोष समर्थित गणनाएं कन्नै जुड़ी दी आर्थिक चैताएं करी 3 ज्हार शा मती चीजें दे आयात उप्पर प्रतिबंध लाई दित्ता हा। छड़ा ट्रांसपोर्ट विभाग ते राज्य संस्थानें कन्नै पंजीकृत लोक गै केई गड्डिडें दा आयात करी सकदे न, जदके होर लोक इक बरे च छड़ी इक गै गड्डि आहन्नी सकदे न।

<><><><><><><>

SMVDSB

जम्मू कश्मीर च श्रद्धालुएं दे आध्यात्मिक अनुभव गी बेहतर करने आस्तै इक महत्वपूर्ण शुरूआत करदे होई श्री माता वैष्णो देवी श्राइन बोर्ड नै श्रद्धालुएं आस्तै हवन पूजा सुविधा शुरू कीती ऐ। आकाशवाणी जम्मू संवाददाता नै दस्सेआ जे वरिष्ठ नागरिकें ते शारीरिक चुनौतिएं दा सामना करा'रदे दिव्यागें आस्तै हैलीकाप्टर सेवाएं च विशेष कोटे दा ऐलान कीता

ऐ। हवन पूजा सुविधा रोज बडलै 9 बजे थमां दपैहरी 3 बजे तोड़ी 4 स्टालें च उपलब्ध होग। बद्धोबद्ध इक दिन च 45 श्रद्धालु एहदे च शामिल होई सकदे न।

<><><><><><>

Foreign Exchange

भारत दा विदेशी मुद्रा भंडार 24 जनवरी गी खत्म होए दे हफ्ते च 5 अरब 57 करोड़ डॉलरें थमां बधियै 629 अरब 55 करोड़ डॉलर होई गेआ ऐ। भारती रिजर्व बैंक दे आंकड़ें मूजब 17 जनवरी गी खत्म होए दे हफ्ते च विदेशी मुद्रा भंडार इक अरब 80 करोड़ डॉलर घटियै 623 अरब 98 करोड़ डॉलर रेही गेआ हा। 24 जनवरी गी खत्म होई दी तिमाही च विदेशी मुद्रा भंडार च बाददा, मुख्य तौर उपपर विदेशी मुद्रा परिसम्पत्ति च बाददे करी होआ ऐ, जेहड़ी 4 अरब 75 करोड़ डॉलर बधियै 537 अरब 89 करोड़ डॉलर होई गई। एहदे अलावा देशौ दा सुन्ने दा मुद्रा भंडार 70 करोड़ 40 लक्ख डॉलर बधियै 69 अरब 65 करोड़ डॉलर होई गेआ ऐ।

<><><><><><>

US Prez

अमरीका च राष्ट्रपति दफ्तरै इस गल्लै दी तसदीक कीती ऐ जे राष्ट्रपति डॉनल्ड ट्रम्प हुंदे प्रशासन आसेआ चीन, कनाडा ते मैक्सिको सने अमरीका दे केई प्रमुख बपारिक भागीदारें पर अज्जै थमां बड़े भारी शुल्क लाए जाडन। व्हाइट हाउस दी प्रेस सचिव कैरोलिन लीविट होरें दस्सेआ जे हून मैक्सिको ते कनाडा पर 25 फीसद जदके चीन पर 10 फीसद शुल्क लाया जाहगा। एह शुल्क अमरीका च गैर-कानूनी तरीके कन्नै फेंटानिल दी बंड्ड दे आरोप च लाया गेआ ऐ। अमरीका च फेंटानिल करी केई जहार लोक मारे गेदे न। डॉनल्ड ट्रम्प होर पैहले गै आखी चुके दे न जे कनाडा ते मैक्सिको गी बिना दस्तावेज दे अमरीका च आवै करदे प्रवासियें ते गैर-कानूनी दवाईएं उपपर रोक लानी होग।

<><><><><><>

Hockey

हॉकी इंडिया लीग च हैदराबाद तूफांस नै जेएसडब्ल्यू सूरमा हॉकी क्लब गी हराइयै फाइनल च थाहर पक्की करी लैती ऐ। एह मैच कल संजा राउरकेला च बिरसा मुंडा स्टेडियम च

खेडेआ गेआ। हैदराबाद तूफांस दा मकाबला अज्ज शराची रढ बंगाल टाईगर्स कन्नै होग। तोआई जेएसडब्ल्यू सूरमा हॉकी क्लब दा मकाबला तमिलनाडू ड्रैगन्स कन्नै अज्ज त्रीए थाहरे आस्तै होग।

<><><><><><>

Cricket

भारत ते इंग्लैंड बश्कार 5एं मैचें दी श्रृंखला दे चौथे टी-20 अंतर्राष्ट्रीय क्रिकेट मैच च कल भारत नै इंग्लैंड गी 15 रंजें कन्नै हराइयै 3—1 कन्नै श्रृंखला अपने नां करी लैती। जित्त लेई 182 रंजें दे लख्य दा पिच्छा करदे होई इंग्लैंड दी टीम 2 गेंदा बाकी रौहदे होई 166 रंजें पर गै आउट होई गई। भारत दी तरफा रवि बिश्नोई ते हर्षित राणा होरें 3—3 विकआं हासल कीतियां, जिसलै के वरुण चक्रवर्ती होरें इक्कै ओवर च 2 विकआं लेइयै जित्त च महत्वपूर्ण योगदान दित्ता।

<><><><><><>

Asian Winter Games

सरकारै औंदी 7 थमां 14 फरवरी तगर चीन दे हारबिन च आयोजित होने आहली 9मीं एशियाई स्यालु खेड्डें च भारती दस्ते दे शामिल होने गी मंजूरी देई दित्ती ऐ। युवा मामलें ते खेड्डें सरबन्धी मंत्रालय नै इक बयाना च आखेआ ऐ जे सरकारै 88 सदस्यें आहले भारती दल दे इस खेड्ड मुकाबले च शामिल होने दी मंजूरी दित्ती ऐ। एहदे च कुल 59 खड्डारी ते टीम कन्नै जुड़े दा 29 लोकें दा अमला शामिल होग। नेहा पैहली बारी ऐ जे जिसलै सरकारै एशियाई स्यालु खेड्डें च देसै दी शमूलियत लेई औपचारिक तौर उप्पर माली सहायता दित्ती ऐ। एशियाई खेड्डें च भारती खड्डारी अल्पाईन स्कीइंग, क्रास कन्ट्री स्कीइंग, फिगर स्केटिंग, शार्ट ट्रैक स्पीड स्केटिंग ते स्पीड स्केटिंग लांग ट्रैक मुकाबलें च हिस्सा लैडन।

<><><><><><>

Annoncement

केन्द्री बजट 2025—26 बारे आकाशवाणी दा क्षेत्रीय समाचार एकांश जम्मू कल ऐतवारें इक विशेष परिचर्चा प्रसारत करोग। 45एं मिंटे दा एह परिचर्चा कल रातीं 8 बजे साढ़े प्राइमरी चैनल पर प्रसारित कीती जाग जेहड़ा तुस मीडियम वेव 303 मीटर यानि 990 किलोहर्टस

एफएम 100.3 मैगाहर्ट्स ते ओआरएम 981 किलोहर्ट्स पर सुनदे हो। इस परिचर्चा च समाज दे बक्ख-बक्ख वर्गे कन्नै तालुक रखने आले माहिर बजट दे बक्ख-बक्ख पैह्लुएं पर चर्चा करगंन। श्रोताओ जेकर तुंदे मने च बजट गी लेइयै कोई सोआल जा शैंका ऐ ते तुस चांहदे ओ जे ओ सोआल अस माहिरें कोला पुच्छचे, तां अपना सोआल तुस साढ़े ई-मेल rnujammu@gmail.com पर लिखियै भेजी सकदे ओ।

<><><><><><>